

全上古三代秦漢
三國六朝文

梁

第八函
第十冊

全梁文卷五十

烏程嚴可均校輯

徐勉

勉字脩仁東海郟人齊永明初國子生射策高第補西陽王國
侍郎遷太學博士鎮軍參軍尚書殿中郎免又除中兵郎領軍
長史梁受禪拜中書侍郎遷建威將軍後軍諮議參軍本邑中
正尚書左丞除給事黃門侍郎尚書吏部郎遷侍中除給事中
五兵尚書遷吏部尚書除散騎常侍領太子右衛率遷左衛將
軍領太子中庶子轉太子詹事領雲騎將軍遷尚書右僕射改
授侍中宣惠將軍又除尚書僕射中衛將軍加中書令移授特
進右光祿大夫大同元年卒年七十謚曰簡肅公有前集三十
五卷後集十六卷

萱草花賦

覽詩人之比興寄草木以命詞惟平章之萱草欲忘憂而樹之爰
有幽憂庭閑志靜高木列其陰蘭芳糝其影翫叢蔕之爭芬悅羣
根之競穎或開紅而散紫成莖蓋於上春信茲花之獨秀投金質
於炎辰既耀色以祛痲亦含香而可均不恃合歡之木无俟孫枝
之筠同芟荷於蘭暑及蟬露乎首夏其葉四垂其跗六出亦曰宜
男加名斯吉麗而不艷雅而不質隨晦明而舒卷與風霜而榮悴
笑杜蘅與揭車何眾彙之能匹

初學記
二十七

鵲賦

觀羽族之多類實巨細以羣飛既若雲而彌上亦棲睫而忘歸爰
有茲禽六翮斯具生无隱嘿質有玄素匪違景而就暑通四節以
馳驚出崑山而抵玉入召南而興賦其識知來其巢知風比之烈
士時起則雄逢翳蒼而翔集乘清吹而西東荷休明以得性游苑

園以自終

初學記
三十

大四百九十三
小一十三

上修五禮表

臣聞立天之道曰陰與陽立人之道曰仁與義故稱導之以德齊之以禮夫禮所以安上治人弘風訓俗經國家利後嗣者也唐虞三代咸必由之在乎有周憲章尤備因殷革夏損益可知雖復經禮三百曲禮三千經文三百威儀三千其大歸有五卽宗伯所掌典禮吉爲上凶次之賓次之軍次之嘉爲下也故祠祭不以禮則不齊不莊喪紀不以禮則背死忘生者眾賓客不以禮則朝覲失其儀軍旅不以禮則致亂於師律冠婚不以禮則男女失其時爲國修身於斯攸急洎周室大壞王道旣衰官守斯文日失其序禮樂征伐出自諸侯小雅盡廢舊章缺矣是以韓宣適魯知周公之德叔侯在晉辨郊勞之儀戰國從橫政教愈泯暴秦滅學掃地無餘漢氏鬱興日不暇給猶命叔孫於外野方知帝王之爲貴末葉紛紛綸遞有興毀或以武功銳志或好黃老之言禮義之式於焉中

止及東京曹褒南宮制述集其散略百有餘篇雖寫以尺簡而終
闕平奏其後兵革相尋異端互起章句旣淪俎豆斯輟方領矩步
之容事滅於旌鼓蘭臺石室之文用盡於帷蓋至乎晉初爰定新
禮荀顗制之於前摯虞刪之於未旣而中原喪亂罕有所遺江左
草創因循而已釐革之風是則未暇伏惟陛下睿明啟運先天改
物撥亂惟武經時以文作樂在乎功成制禮弘於業定光啟二學
皇枝等於貴遊闢茲五館草萊升以好爵爰自受命迄于告成盛
德形容備矣天下能事畢矣明明穆穆無德而稱焉至若玄符靈
貺之祥浮溟機山之費固亦日書左史副在司存今可得而略也
是以命彼羣才搜甘泉之法延茲碩學闡曲臺之儀淄上淹中之
儒連蹤繼軌負笈懷鉛之彥匪旦伊夕諒以化穆三雍人從五典
秩宗之教勃焉以興伏尋所定五禮起齊永明三年太子步兵校
尉伏曼容表求制一代禮樂於時參議置新舊學士十人止修五

禮諮稟衛將軍丹陽尹王儉學士亦分住郡中製作歷年猶未克就及文憲薨殂遺文散逸後又以事付國子祭酒何肩經涉九載猶復未畢建武四年肩還東山齊明帝敕委尙書令徐孝嗣舊事本未隨在南第永元中孝嗣於此遇禍又多零落當時鳩斂所餘權付尙書左丞蔡仲熊驍騎將軍何佟之共掌其事時修禮局住在國子學中門外東昏之代頻有軍火其所散失又踰大半天監元年佟之啟審省置之宜敕使外詳時尙書參詳以天地初革庶務權輿宜俟隆平徐議刪撰欲且省禮局併還尙書儀曹詔旨云禮壞樂缺故國異家殊實宜以時修定以爲永准但頃之修撰以情取人不以學進其掌知者以貴總一不以稽古所以歷年不就有名無實此旣經國所先外可議其人人定便卽撰次於是尙書僕射沈約等參議請五禮各置舊學士一人人各自舉學士二人相助抄撰其中有疑者依前漢石渠後漢白虎隨源以聞請旨斷

決乃以舊學士右軍記室參軍明山賓掌吉禮中軍騎兵參軍嚴
植之掌凶禮中軍田曹行參軍兼太常丞賀暘掌賓禮征虜記室
參軍陸璉掌軍禮右軍參軍司馬褫掌嘉禮尚書左丞何佟之總
參其事佟之亡後以鎮北諮議參軍伏暉代之後又以暉代嚴植
之掌凶禮暉尋遷官以五經博士繆昭掌凶禮復以禮儀深廣記
載殘缺宜須博論共盡其致更使鎮軍將軍丹陽尹沈約太常卿
張充及臣三人同參厥務臣又奉別敕總知其事未又使中書侍
郎周捨庾於陵二人復豫參知若有疑義所掌學士當職先立議
通諮五禮舊學士及參知各言同異條牒啟聞決之制旨疑事既
多歲時又積制旨裁斷其數不少莫不網羅經誥玉振金聲義貫
幽微理入神契前儒所不釋後學所未聞凡諸奏決皆載篇首具
列聖旨爲不刊之則洪規盛範冠絕百王茂實英聲方垂千載寧
孝宣之能擬豈孝章之足云五禮之職事有繁簡及其列畢不得

同時嘉禮儀注以天監六年五月七日上尚書合十有二秩一百一十六卷五百三十六條賓禮儀注以天監六年五月二十日上尚書合十有七秩一百三十三卷五百四十五條軍禮儀注以天監九年十月二十九日上尚書合十有八秩一百八十九卷二百四十條吉禮儀注以天監十一年十一月十日上尚書合二十有六秩二百二十四卷一千五條凶禮儀注以天監十一年十一月十七日上尚書合四十有七秩五百一十四卷五千六百九十三條大凡一百二十秩一千一百七十六卷八千一十九條又列副祕閣及五經典書各一通繕寫校定以普通五年二月始獲洗畢竊以撰正履禮歷代罕就皇明在運厥功克成周代三千舉其盈數今之八千隨事附益質文相變故其數兼倍猶如八卦之爻因而重之錯綜成六十四也昔文武二王所以綱紀周室君臨天下公旦脩之以致太平龍鳳之瑞自斯厥後甫備茲日孔子曰其有

繼周雖百代可知豈所謂齊功比美者歟臣以庸識謬司其任淹
畱歷稔允當斯責兼勒成之初未遑表上實由才輕務廣思力不
周永言慙惕無忘寤寐自今春輿駕將親六師搜尋軍禮閱其條
章靡不該備所謂郁郁文哉煥乎洋溢信可以懸諸日月頌之天
下者矣愚心喜抃彌思陳述兼前後聯官一時皆逝臣雖幸存耄
已將及慮皇世大典遂闕騰奏不任下情輒具載撰修始末并職
掌人所成卷秩條目之數謹拜表以聞

梁書徐勉傳普通六年又南史六十

上疏請禁速斂

禮記問喪云三日而後斂者以俟其生也三日而不生亦不生矣
自頃以來不遵斯制送終之禮殯以暮日潤屋豪家乃或半晷衣
衾棺槨以速為榮親戚徒隸各念休反故屬續纒畢灰釘已具忘
狐鼠之顧步愧燕雀之徊翔傷情滅理莫此為大且人子承衾之
時志懣心絕喪事所資悉關他手愛憎深淺事實難原如覘視或

爽存沒違濫使萬有其一怨酷已多豈若緩其告斂之晨申其望
生之冀請自今士庶宜悉依古三日大斂如有不奉加以糾繩

梁書

徐勉傳時人間喪事多不遵禮朝終夕殯相尚以速勉上疏詔可

釋奠會升階議

鄭玄云由命士以上父子異宮宮室既異無不由阼階之禮請釋
奠及晏會太子升堂並宜由東階若輿駕幸學自然中陞又檢東
宮元會儀注太子升崇正殿不欲東西階責東宮典儀列云太子
元會升自西階此則相承為謬請自今東宮大公事太子升崇正

殿並由阼階其預會賓客依舊西階

隋書禮儀志四天監八年皇太子釋奠吏部郎徐勉議又

見通典五十三

謝敕賜絹啟

臣勉言傳詔傳靈惠宣敕垂賜絹二十四匹伏惟皇太子睿情天發
粹性玄凝作震春方繼離朱陸嘉日茂辰畢宮告始龍樓起曜博

望增華含生鳧藻率土抃躍臣運屬會昌命逢多幸預奉休盛復
頒恩錫白素起獨麗之色兼兩邁丘園之賁慶荷之情實百常品
不任下情謹奉啟謝聞謹啟

初學記
二十七

報伏挺書

復覽來書累牘兼翰事苞出處言兼語默事義周悉意致深遠發
函伸紙倍增憤歎卿雄州擢秀弱冠升朝穿綜百家佃漁六學觀
眸表其韶慧視色見其英朗若魯國之名駒邁雲中之白鶴及占
顯邑試吏腴壤將有武城弦歌桐鄉謠詠豈與卓魯斷斷同年而
語邪方當見賞良能有加寵授飾茲簪帶寘彼周行而欲遠慕卷
舒用懷愚智既知益之爲累爰悟滿則辭多高蹈風塵良所欽挹
況以金商戒節素秋御序蕭條林野無人相樂偃卧墳籍遊浪儒
玄物我兼忘寵辱誰滯誠乃歡羨用有殊同今逖聽傷求興懷寤
宿白駒空谷幽人引領貧賤爲恥鳥獸難羣故當捐此薜蘿出從

鵷鷺無乖隱顯不亦休哉吾智乏佐時才慙濟世稟承朝則不敢
荒寧力弱途遙愧心非一天下有道堯人何事得因疲病念從閑
逸若使車書混合尉候無警作樂制禮紀石封山然後乃返服衡
門實爲多幸但夙有風欬邁茲虛眩瘠類士安羸同長孺簿領沈
廢臺閣未理娛耳爛腸因事而息非關欲追松子遠慕畱侯若乃
天假之年自當靖恭所職擬非倫匹良覺辭費覽復循環爽焉如
失清塵獨遠白雲飄蕩依然何極猥降書札示之文翰覽復成誦
流連縟紙昔仲宣才敏藉中郎而表譽正平穎悟賴北海以騰聲
望古料今吾有慙德倘成卷帙力爲稱首無令獨耀隨掌空使辭
人扼腕式閩願見宜事掃門亦有來思赴其懸榻輕苔魚網別當
以薦城闕之歎曷日無懷所遲萱蘇書不盡意

梁書伏
挺傳

答釋法雲書難范縝神滅論

天旨所答臣下神滅論一日羸蒙垂示辱告重送伏加研讀窮理

盡寂精義入神文義兼明超深俗表詳求三世皎若發蒙非直謹
加誦持輒合班之未悟惠示承眷至弟子徐勉和南宏明集十
爲書誠子崧

吾家世清廉故常居貧素至於產業之事所未嘗言非直不經營
而已薄躬遭逢遂至今日尊官厚祿可謂備之每念叨竊若斯豈
由才致仰藉先代風範及以福慶故臻此耳古人所謂以清白遺

子孫不亦厚乎

梁書徐勉傳又略見
藝文類聚二十三

遺子黃金滿贏不如一經詳求此言信非徒語吾雖不敏實有本
志庶得遵奉斯義不敢墜失所以顯貴以來將三十載門人故舊
亟薦便宜或使創闢田園或勸興立邸店又欲舳舻運致亦合貨
殖聚斂若此事眾皆距而不納非謂拔葵去織且欲省息紛紜中
牟聊於東田閒營小園者非在播藝以要利人正欲穿池種樹少
寄情賞又以郊際閑曠終可爲宅儻獲懸車致事實欲歌哭於斯

慧曰十住等旣應營婚又須住止吾清明門宅無相容處所以爾者亦復有以前割西邊施宣武寺旣失西廂不復方幅意亦謂此逆旅舍耳何事須華常恨時人謂是我宅古往今來豪富繼踵高門甲第連闔洞房宛其死矣定是誰室但不能不爲培塿之山聚石移果雜以花卉以娛休沐用託性靈隨便架立不在廣大惟功德處小以爲好所以內中逼促無復房宇近營東邊兒孫二宅乃藉十住南還之資其中所須猶爲不少旣牽挽不至又不可中塗而輟郊閒之園遂不辦保貨與韋黯乃獲百金成就兩宅已消其半尋園價所得何以至此由吾經始歷年粗已成立桃李茂密桐竹成陰塍陌交通渠畎相屬華樓迴謝頗有臨眺之美孤峯叢薄不無糾紛之興瀆中竝饒菰蔣湖裏殊富芟荷雖云人外城闕密邇羣生欲之亦雅有情趣追述此事非有公心蓋是筆勢

南史作
事意

所至耳憶謝靈運山家詩云中爲天地物今成鄙夫有吾此園有

之二十載矣。今爲天地物物之與我相校，幾何哉？此吾所餘。今以分汝營小田，舍親累，旣多理，亦須此。且釋氏之教以財物謂之外命，儒典亦稱何以聚人曰財。況汝曹常情安得忘此？聞汝所買姑熟田地，甚爲舛鹵，彌復可安。所以如此，非物競故也。雖事異寢，聊可髣髴。孔子曰：居家理治，可移於官。旣已營之，宜使成立。進退兩亡，更貽恥笑。若有所收穫，汝可自分贍。內外大小，宜令得所。非吾所知，又復應沾之諸女耳。汝旣居長，故有此及。凡爲人長，殊復不易。當使中外諧緝，人無閒言。先物後己，然後可貴。老生云：後其身而身先，若能爾者，更招巨利。汝當自勗，見賢思齊，不宜忽略。以棄日也。藝文類聚此下有非徒二字棄日乃是棄身，身名美惡，豈不大哉？可不慎歟！今之所敕略言，此意正謂爲家已來，不事資產，旣立墅舍，以乖舊業，陳其始末，無愧懷抱。兼吾年時朽暮，心力稍殫，牽課奉公，略不克舉。其中餘暇，裁可自休，或復冬日之陽，夏日之陰，良辰美

景文案閒隙負杖躡屩逍遙陋館臨池觀魚披林聽鳥濁酒一杯
彈琴一曲求數刻之暫樂庶居常以待終不宜復勞家閒細務汝
交關旣定此書又行凡所資須付給如別自茲以後吾不復言及
田事汝亦勿復與吾言之假使堯水湯旱吾豈知如何若其滿庾
盈箱爾之幸遇如斯之事竝無俟令吾知也記云夫孝者善繼人
之志善述人之事今且望汝全吾此志則無所恨矣

略見藝文類
聚二十三

梁書徐勉傳
南史六十又

答客喻

普通五年春二月丁丑余第二息晉安內史悱喪之問至焉舉家
傷悼心情若隕二宮竝降中使以相慰勗親遊賓客畢來弔問輒
慟哭失聲悲不自已所謂父子天性不知涕之所從來也於是門
人慮其肆情所鍾容致委頓乃斂衽而進曰僕聞古往今來理運
之常數春榮秋落氣象之定期人居其閒譬諸逆旅生寄死歸著

於通論是以深識之士悠爾忘懷東門歸無之旨見稱往哲西河
喪明之過取誚友朋足下受遇於朝任居端右憂深責重休戚是
均宜其遺情下流止哀加飯上存奉國俯示隆家豈可縱此無益
同之兒女傷情損識或虧生務門下竊議咸爲君侯不取也余雪
泣而答曰彭殤之達義延吳之雅言亦常聞之矣顧所以未能弭
意者請陳其說夫植樹階庭欽柯葉之茂爲山累勿惜覆簣之功
故秀而不實尼父爲之歎息析彼岐路楊子所以畱連事有可深
聖賢靡仰今吾所悲亦以悱始踰立歲孝悌之至自幼而長文章
之美得之天然好學不倦居無塵雜多所著述盈帙滿笥淡然得
失之際不見喜愠之容及翰飛東朝參伍盛列其所遊往皆一時
才俊賦詩頌詠終日忘疲每從容謂吾以遭逢時來位隆任要當
應推賢下士先物後身然後可以報恩明主克保元吉俾余二紀
之中忝竊若是幸無大過者繫此子之助焉自出閩區政存清靜